

## ODRŽANA GODIŠNJA SKUPŠTINA SUGGSUBIH

Redovna godišnja Skupština Saveza udruženja građana geodetske struke u Bosni i Hercegovini održana je 14. 10. 2019. godine u sjedištu Udruženja u Sarajevu, sa početkom u 16:00 sati.



Slika 1. Radna atmosfera na Skupštini SUGGSUBIH

Predsjednik Skupštine Udruženja, doc. dr. sc. Nedim Tuno, predložio je sljedeći dnevni red:

- usvajanje dnevnog reda, imenovanje zapisničara i ovjerivača zapisnika,
- izvještaj o radu SUGGSUBIH za period 2015 - 2019,
- izbor tijela SUGGSUBIH i uredničkih tijela časopisa „Geodetski glasnik“ i
- razno.

Dnevni red je usvojen jednoglasno, nakon čega su uslijedila imenovanja Muamera Đidelije za zapisničara, a Irfana Kereša i Nedima Kule za ovjerivače zapisnika.

Predsjednik SUGGSUBIH prof. dr. Admir Mulahusić podnio je izvještaj o radu SUGGSUBIH u prethodne četiri godine, kao i finansijski izvještaj za navedeno razdoblje. Predsjednik je u svom izlaganju posebno istakao izvrsne rezultate postignute u izdavanju i jačanju međunarodne vidljivosti i prepoznatljivosti naučno-stručnog časopisa „Geodetski glasnik“, a bilo je riječi i o brojnim javnim predavanjima uglednih naučnika iz inostranstva, koje je organizovalo Udruženje, kao i članstvu Udruženja u krovnoj međunarodnoj organizaciji iz oblasti geodezije i geoinformatike – IUGG. Iz finansijskog izvještaja vidljivo je da se glavna stavka finansijskih rashoda odnosi na troškove štampanja časopisa „Geodetski glasnik“, dok se prihodi većinom ostvaruju kroz projekte Federalnog ministarstva obrazovanja i nauke vezane za sufinansiranje izdavanja časopisa, te donacijama nekolicine privatnih geodetskih kompanija.

Nakon prezentovanog, a potom i jednoglasno usvojenog izvještaja, predsjednik SUGGSUBIH je predložio izbor tijela SUGGSUBIH i kandidate za pojedine pozicije, što su članovi Skupštine SUGGSUBIH jednoglasno prihvatili. Za predsjednika SUGGSUBIH izabran je doc. dr. Jusuf

Topoljak, dok je za potpredsjednika izabran Nedžad Pašalić. Funkciju predsjednika Skupštine SUGGSUBIH će u narednom periodu obavljati Irfan Kereš, dok će za poslove sekretara Udruženja biti zadužen Muamer Đidelića.

U nastavku rada Skupštine, temeljem prijedloga predsjednika SUGGSUBIH, prof. dr. Admira Mulahusića, na mjesto glavnog i odgovornog urednika časopisa „Geodetski glasnik“, jednoglasno je izabran doc. dr. Nedim Tuno, dok su poslovi tehničkog urednika časopisa „Geodetski glasnik“ povjereni Nedimu Kuli. Promjene se odnose i na urednički odbor časopisa, u koji je imenovano 7 novih članova – uglednih profesora iz Slovenije, Hrvatske, BiH, Srbije, Grčke i Turske. Jednoglasno je podržan i prijedlog predsjednika SUGGSUBIH o izmjenama u Bosanskohercegovačkom nacionalnom odboru pri IUGG-u.



Slika 2. Izlaganje predsjednika SUGGSUBIH prilikom podnošenja Izveštaja o radu

U okviru zadnje tačke dnevnog reda Skupštine donesene su odluke o reviziji članstva u SUGGSUBIH i o pokretanju aktivnosti na izradi, a potom i objavljivanju monografije povodom 60 godina permanentnog izučavanja geodezije u okviru geodetskih studijskih programa na UNSA.

Predsjednik Skupštine je zaključio sjednicu istog dana u 19:00 sati.

*Jusuf Topoljak*

*Nedim Tuno*